

**REGIONAL NEWS BULLETIN**

**HEADLINES (MORNING)**

1. ZORO General Headquarters buatsaihin Free Movement Regime (FMR) hlih leh Border fencing tum duhloh lantirna nimin khan Aizawl leh Dist dang thenkhatah neih a ni.
2. Mizoram Aam Aadmi Party chuan Mizoram sawrkar in Lengpui Airport Indian Air Force kuta hlan a tum chu tha an tih loh thu an sawi.
3. Maha Kumbh neih mekah mipui inpawng nekna avanga thi chu mi 30 an tling tawh a,
4. Sawrkar laipui chuan cheng vaibelchhe sing 3 leh sang 4 chuang senna tur National Critical Mineral Mission a pawm.



**ZORO**

ZORO General Headquarters buatsaihin Free Movement Regime (FMR) hlih leh Border fencing tum duhloh lantirna nimin khan Aizawl leh Dist dang thenkhatah neih a ni a.

Aizawl-ah leh Champhaiah chuan FMR hlip a, kengkawh tura India sorkar thupek leh Mizoram sorkar thupek hal a ni.

He huna thusawitu Pu Rohmingthanga Kawlni ZORO Vice President chuan, “Central sorkarin zalen taka an unaute nena an inkalpawh theih dan hlip a, a hlihna order a siam a, Christmas present niawm taka a rawn thawn chu ZORO chuan a lungchhiat thlak a ti a, chumi ruala Mizoram sorkarin hmanhmawh taka hman theih tura a buaipui rum rum chu ZORO chuan a hrethiam lova an lungawi lo hle a ni.” a ti.

He huna thusawitu dang Pu L. Ramdinliana Renthlei ZORO General Secretary chuan, “Free Movement Regime (FMR) thiah leh Border fencing chu a lan danah chuan Zofa zawng zawngin an duh lo vek a, India sorkarin a ti lui a nih chuan ZORO chuan a dodal zel dawn a, na zawk a hmala turin ruahmanna siam a ni dawn a ni a ti.

Aizawlah hian ZORO in Free Movement Regime hlih leh border fencing duhloh lantirnaah hian MPCC aiawhin Pu Joseph Lalhimpuia, GS, MNF aiawhin Pu T.J. Lalnuntluanga, Ex-Minister leh ZPM aiawhin Pu Ngursailova Sailo, PAC in thu an sawi a ni. Free Movement Regime (FMR) hlih leh Border fencing tum duhloh lantirna hi Champhai, Serchhip, Lunglei, Kolasib, Mimbung, Vaphai leh Tengenopal Manipur-ah te hman a ni bawk a ni.

**(PR)**



**HEALTH MINISTER**

Health Minister Pi Lalrinpuin, LADC Office leh Central Young Lai Association Office nimin khan a tlawh a, Chief Executive Member Pu C. Lalmuanthanga bakah Executive Member-te leh LADC Official ten lo dawngsawngin, LADC CEM Conference Hall-ah inkawmho.

CEM Pu C. Lalmuanthanga chuan Doctor indaih lohnate, Sub-Centre a thawktu ennawn chungchangte, LADC in project proposal a siamte enzui pui tur leh Tourism lamah hmasawna tur ruahmante leh pawimawh dangte lo sawipuiin, hmalak pui turin a ngen a.

Health Minister Pi Lalrinpuin chuan LADC Sorkar chu Lawngtlai District mipuite tan theitawp chhuah puiah a sawm a, an thu thlen leh mamawhte theitawpphuaha lo bawhzui atum thu leh hmalakpui a tum thu a sawi a. District Hospital Lawngtlai tih changtlunte, Health Worker lak belhte, Lawngtlai District tan CT Scan dah tum a nih thute a sawi.

Tourism Minister chuan LADC chhunga Tourist Lodge-te LADC kuta hlanchwahn dan tur buaipui mek ani a, Autonomous District Council-te nen inrem taka hnathawh kan duh a, kan zavaia tana thawhho hi a pawimawh, sawrkar hmalakna turah in enhranna a awm lo, a ti a, Ruihhlo do kawngah LADC Sorkar chu hmalakpuiturin ah a sawm bawk.

LADC mipawimawhte nen an inkawm zawh hian Health Minister chu Central YLA Office ah lengin, Central YLA President Pu F.Lalrothanga leh hruaitu dangten an lo dawngsawng, Central YLA

hruaitute chuan District Hospital a hnimhlum Doctor dah a tul thu te, Bungtlang South Doctor chu Specialist a zir vanga a aiawh dah turte, Ruihhlo ngaite enkawl na tihlen a tulthute Health Minister hnen ah an thlen bakah Central YLA hnuai ruihhlo dotu Drug Reduction Squad te hnathawh Minister hi an hrilh.

Pi Lalrinpui chuan Doctor indaihlohna chu Sorkarin a hriatthu leh tunmaiah Doctor dahtur an awmluh thu leh remchang hmasa ber ah Lawngtlai District chu ngaih pawimawh a nih tur thu a sawi a, Ruihhlo do na ah YLA te hnathawh chu ropui a tihthu sawiin, Lawngtlai District chu a biktaka ruihhlo do na ah pawh enbinga, duhsak theihna laiah duhsak tul a tih thu a sawi bawk.

Tourism Minister chuan Chhimtuipui a Lungmak chu a tlawhtute tan a awlsam zawk nan Hruitezawl Lawngtlai atang leh Siaha District lam atangin kawng sial tum a ni a ti.

**(Lalnggheta Ralte Lawngtlai PTC)**

<><><>

**AAP**

Mizoram Aam Aadmi Party chuan Mizoram sawrkar in Lengpui Airport Indian Air Force kuta hlan a tum chu tha an tih loh thu an sawi.

Mizoram AAP ten an thuchhuah siam a an tarlan danin, Indian Air Force hnena Lengpui airport Mizoram sorkarin hlan a tumna kawnga hmalak mekna leh hmalak tawhna lo awm tawh zawng zawng chu chawhlan a tihtawp nghal an duh thu an sawi a. Mizoram in Airport enkawl theilo sawrkar a nei chu a tlawmthlak an tih thu leh a zahthlak an tih hle thu an tarlang bawk.

Mizoram AAP-te chuan Lengpui Airport chu Mizoram a hmun pawimawh, tu leh fate thleng a chhawm theih tur, Mizote rohlu neih tlemte te zing a nih thu sawiin, midang nena intawm duhna rilru pu hruaitu Mizoram in a nei chu vanduaithlak an tih takzet thu an sawi a, Mizoram in rohlu a neih sa-te tihral tuma hmalak ai chuan ZPM sawrkar chuan Mizo mipuite hnena an intiamna a hlawhtlin theihnan theihtawp in hma la zawk se an tih thu leh ZPM Sorkarin “Kan ti ang”, an tih chu ti hlawhtling phawt tura an duh thu an thuchhuah siamah hian an tarlang bawk.

**(CORR)**

<><><>

**PWD**

Mizoram chhunga National Highway Kilometer 590. 29 chu Mizoram PWD-ten an enkawl mek thu an sawi.

Mizoram PWD hotuten Akashvani News an hrilh danin National Highway enkawl na leh chei thatna atan kumin sorkar pawisa kumah cheng vaibelchhe 160 an hmuh tawh thu leh hna pawh za zela 28% thawh zawh tawh a nih thu an sawi. PWD hotute chuan Central Road Fund hnuai kawng panga, a vai a belhkhawm a kilometer 89.62-a thui siamna atan cheng vaibelchhe 302 leh nuai 33 hmuh a nih tawh thu an sawi a, hemi hnuai hian hna pawh za a 78.32% thawh zawh tawh a nih thu an sawi bawk.

Voice Cast : *Mizoram PWD hotute sawi danin PMGSY Scheme thar, PMGSY-III hnuai kawng 17, kilometer 487.50 bial a thui cheng vaibelchhe 469 leh nuai 62 man sanction hmuh a ni a, contractor pawh thlan fel tawh niin, hna tan thui turin an inbuatsaih mek a ni.*

Lalnunhlui Akashvani News Aizawl

**(CORR)**

<><><>

**ZPM**

ZPM Thalai Hq chuan thuchhuah siamin Vairengte leh Sairang inkara Fourlane kaltlangna tura ram nei tu hrang hrang te'n zangnadawmna an hmu dawn tih an sawi a,

ZPM, Mipui sawrkar hmalakna chak tak vanga ram neitu te'n, an lo nghahhlelh em em Zangnadawmna an hmu thei dawn ta chu lawmawm an ti tih sawiin a hlawhtlinna tura chak taka hmalatu Chief Minister zahawm tak Pu Lalduhom chu an chhuang takzet a an ti.

Vairengte leh Sairang inkar kawng laih ah hian a ram neitu thenkhat te'n Forest Clearance an hmuh theih loh vangin Zangnadawmna an hmu thei ngai lova, ram neitu te hian an dikna chanvo hmuh ngei tumin, hmala mahse, an hlawhchham thin a, amaherawhchu Pu Lalduhoma chuan, he buaina hi a rang lama chingfel a, ram neitu te'n a rang lama zangnadawmna an hmuh ngei theih nan sawrkar laipui lamah na taka nawrin, hma ala nghal a, chak taka a hmalakna kal zel a zarah, Central Sawrkar chuan Chief Miniater Pu Lalduhoma ngenna chu pawmin, India rama a wawi khatna ni turin, Ministry of Road Transport & Highway chuan Double Compensation Ram neitu te hnenah cheng vbc. ₹1,100/- leh Forest Department te hnenah a cheng vbc. ₹90/ a rawn pechhuak dawn ta a ni an ti.

**(PR)**

<><><>

**CHILLI**

Mizoramah kum 2024 chhungin hmarcha quintal 5858 leh kg 5065 chin a ni a, quintal 37,929 leh kg 475 thar chhuah beisei a ni.

Agriculture Department chhinchhiah danin Mizoram chhunga hmarcha chinna atan hian ram acre 11831 leh bigha 42 hman a ni a, Mizoram pum ang a chhutin chhungkaw 8687 ten hmarcha hi an ching a ni.

Mizoram District hrang hrang zingah hmarcha hi Aizawl District-a chhungkaw 1,138 ten ram acre 1,218-a zauva quintal 43 leh kg 735 an chin atangin quintal 2435 leh kg 605 thar chhuah beisei a ni a, district dang pariat, Lunglei, Siaha, Lawngtlai, Kolasib, Serchhip, Khawzawl, Saitual leh Hnahthial a chhungkaw 6345 ten ram acre 8328 leh bigha 25-a zua va hmarcha quintal 893 leh kg 7175 an chin atangin quintal 32,479 leh kg 76 tharchhuah beisei a ni bawk.

*Voice Cast :Mizoram distict zinga hmarcha ching hnem ber hi Champhai district an ni a, Champhai District-a chhungkaw 851 ten hamrcha quintal 177 leh kg 202 an chin atangin quintal 2130 leh kg 91 tharchhuah beisei a ni a, hmarcha ching tlem ber district chu Mamit district niin chhungkaw 353 ten hmarcha quintal 11 leh kg 4 an chinah quintal 883 leh kg 2 tharchhuah beisei a ni bawk.*

*John Vanlalchhuanga, Akashvani News Aizawl.*

Corr

<><><>

#### AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Wawiin chawhnu dar 2 leh a chanve-ah Chanchinthar hi puan leh a ni ang.

<><><>

#### MAHAKUMBH

Hindu te intawhkhawm Prayagraj-a Maha Kumbh neih mekah mipui inpawng nekna avanga thi chu mi 30 an tling tawh a, mi 60 chuangin hliam an tuar. President Draupadi Murmu leh Prime Minister Narendra Modia te chuan vanduaina thleng chu pawl an tih thu sawiin an thinlung a na hle an ti a. President Murmu-i chuan mitthi chhungte a tawrhpuu thu sawiin hliam tuarte pawh an dam leh thuai theih nan duhsakna a hlan a ni.

PM Modia pawhin sakhaw hunpui chhim tura kal zingah nunna chan an awm chu pawl atih thu a sawi a. Social Media kaltlangin a tawrhpuu thu thawnin hliam tuarte pawh dam thuai turin duhsakna a hlan a. UP Chief Minister Yogi Adityanath nen pawh an inbiak thu sawiin state sawrkarte nen an inbiakpawh reng thu a sawi bawk a ni.

Vanduaaina thlen chungchangah hian UP CM Yogi Adityanath judicial inquiry tih a nih tur thu a sawi a. Nimin zing dar 1 atanga dar 2 inkar vel khan indaidainna siam chu mi tamtakin an bawhchhiat avangin vanduaaina hi a thleng a ti a. Hliam tuarte hi damdawiinah rang taka hruai nghal an nih thu a sawi bawk a ni. Tun dinhmunah Mahakumbh ah hian mi vaibelchhe 8 atanga vaibelchhe 10 vel an awm thu a sawi a ni.

(Corr)

<><><>

#### CRITICAL MINERAL MISSION

Sawrkar laipui chuan cheng vaibelchhe sing 3 leh sang 4 chuang senna tur National Critical Mineral Mission a pawm. He hmalakna hian a tum ber chu boruak ti chhe tlem chi thiamna green technology ti hmasawn tura ramchhunga leilung hausakna lei leh hralh a ni a. Union Information and Broadcasting Minister Ashwini Vaishnav chuan ram eibar dinhmun ti hmasawn tura critical mineral te an pawimawh thu a sawi a ni.

(Newsonair)

<><><>

#### ALL PARTY MEETING

Parliament Budget Session lo awm tur pualin sawrkar chuan wawiin hian political party tin aiawh inhmuikhawm a ko. Puan tawh angin Budget session hi naktuk Zirtawpni hian tan tur a ni a. Inrinniah Union Finance Minister Nirmala Sitharaman-i chuan Union Budget 2025-26 Parliament ah a pharh ang.

(Newsonair)

<><><>